



Ака́фист

святе́й му́ченице

Тати́ане Ри́мской

Кондак 1

Избра́нной не́весте Христа́, всея́ тва́ри Соде́теля, похва́льная пе́ния воспису́ем, чистоту́ жити́я твоего́ де́вственнаго восхваля́юще и честна́я страда́ния твоя́ лобыза́юще. Ты же, в небе́сном черто́зе Жениха́ твоего лику́ючи, помина́й нас, прославля́ющих тя пе́нии хвале́бными и зову́щих ти с весе́лием:

Ра́дуйся, благоуха́нный цвѣте де́вства, сла́вная му́ченице Тати́ано.

Икос 1

А́нгелов Творе́ц воззва́ тя от вѣтхаго Ри́ма, да песнопое́ши равноа́нгельным жити́ем твои́м свято́е и́мя Бо́жие, кончи́ною же му́ченическою и́мя Его́ да просла́виши; ны́не убо, зря́ще небе́сную славу твою́, сицевы́ми словесы́ воспева́ем тя:

Ра́дуйся, в добродетели изде́тска наста́вленная;
ра́дуйся, во стра́се Бо́жии воспита́нная.

Ра́дуйся, божественное Писание возлюбившая;
ра́дуйся, словом Божиим напоенная.

Ра́дуйся, богобоязненному родителю внимающая;
ра́дуйся, семена веры от него приемшая.

Ра́дуйся, земная вся презревшая;
ра́дуйся, вечных благ взыскавшая.

Ра́дуйся, ум горе имевшая;
ра́дуйся, к небесі́ духом воспарявшая.

Ра́дуйся, девице благоглаголивая;
ра́дуйся, юнице сладкоуханная.

Ра́дуйся, благоуханный цвете девства, славная
мученице Татиано.

Кондак 2

Ви́дя благочестивый родитель твой житие твое,
всечестная, насладися дарований божественных
в тебе, паче бо знатности своея и власти
консульския любляше Христа, на всяк день
хвалу Ему поя: Аллилу́ия.

Икос 2

Ра́зум небесный даровася тебе, святая, егда бо юности достигла еси, тогда житие твое в девстве проводи восхотела еси. Христос же Бог, души́ твоея́ доброту ви́дй, укрепляше тя на пути сем; темже, чистоте твоей дивящся, воспеваем ти:

Ра́дуйся, целомудрию прилежавшая;

ра́дуйся, девство облобызавшая.

Ра́дуйся, Христу юность посвятившая;

ра́дуйся, во младости Ему послужившая.

Ра́дуйся, ко Спасу любовьию пламенеющая;

ра́дуйся, Сему единому уневестившаяся.

Ра́дуйся, Жениху верна пребывшая;

ра́дуйся, Того ради страдание подъемшая.

Ра́дуйся, во дворех горних всельшаяся;

ра́дуйся, в небесном царствии ликующая.

Ра́дуйся, целомудренных помощнице;

ра́дуйся, девственниц наставнице.

Ра́дуйся, благоуханный цвѣте дѣвства, сла́вная мученице Тати́ано.

Кондак 3

Сила божественная любви твоя содела тя
диаконису, сиречь служительницу Христу,
отонудуже в радости возглашала еси Ему
непрестанно: Аллилу́ия.

Икос 3

Имущи любовь ко ближним во Христе, ангелом
бестелесным уподобилася еси, Татиано, в новом
звании усердно труждающихся и подвиги твоя
усугубляющи. Мы же, аще и грехми своими
отстоим далече от тебе, обаче, на милость твою
уповающе, сицевыя тебе воссылаем хвалы:

Ра́дуйся, моления на всяк час Богу возносившая;
радуйся, в молитве силу обретавшая.

Радуйся, бедных питательнице;

радуйся, вдовиц утешительнице.

Радуйся, узников в темницах посещавшая;

радуйся, сих страдания облегчавшая.

Радуйся, яко язвы их врачевала еси;

радуйся, яко мучеников ободряла еси.

Радуйся, благодати крещения споспешнице;

раду́йся, бани пакибы́тия служительнице.

Раду́йся, к купели жен приуготовля́вшая;

раду́йся, о спасении их усердова́вшая.

Ра́дуйся, благоуха́нный цвѣте дѣвства, сла́вная мученице Тати́ано.

Кондак 4

Бу́ря напастей воздвижесе́ на христианы́,
Александру Северу воцарившуся: аще бо и не
гоняше сей кесарь истинную веру, обаче
советницы его, от нихже лютейший Ульпиан бе,
богом римским кланяться верныя понуждаху.
Тии же, нечестиваго сего повеления небрегше,
истинному Богу восклицаху: Аллилу́ия.

Икос 4

Слы́шаще тя христианку быти, дево
всехвальная, нечестивии язычницы ведоша тя
во храм бога своего Аполлона, да идолу
поклонишися; ты же, святая, безумие их
отринувши, Богу истинному поклонилася еси.
Абие же падесе́ кумир их, и храм разрушися, и
бес восстенав бежа; и того ради невернии
смятошася и убояшася, христоименитии же
людие в радости воззваша ти:

Ра́дуйся, яко не убоялася еси прещения;
раду́йся, яко не устрашилася еси мучения.

Раду́йся, Христова ученице;
раду́йся, Спасова проповеднице.

Раду́йся, идольское нечестие отвергшая;
раду́йся, кумирослужению посмеявшаяся.

Раду́йся, ложным богом не поклонившаяся;
раду́йся, истинного Бога почетшая.

Раду́йся, мужеству нас научающая;
раду́йся, в доблести наставляющая.

Раду́йся, верных ободрение;
раду́йся, мучеников веселие.

Ра́дуйся, благоуханный цвѣте дѣвства, сла́вная
мученице Тати́ано.

Кондак 5

Богора́дованную песнь воспела еси Христу,
Тати́ано, внегода сподобилася еси за Жениха
своего пострадати: Аллилу́ия.

Икос 5

Видяще чудо, во храме Аполлонове бывшее, не
вразумишася беззаконнии, обаче на мучения тя
ведоша. Мы же, твердость твою зряще и
упование на Бога ведуще, ублажаем тя пении
сицевыми:

Ра́дуйся, губителя погубившая;

ра́дуйся, ложного бога низвергшая.

Ра́дуйся, демона далече отгнавшая;

ра́дуйся, лукаваго преогорчившая.

Ра́дуйся, немощь естества презревшая;

ра́дуйся, паче естества укрепленная.

Ра́дуйся, рожденная в дольних;

ра́дуйся, воззревшая в горняя.

Ра́дуйся, небесным светом озаренная;

ра́дуйся, благодатию осиянная.

Ра́дуйся, нечестия потоки иссушившая;

ра́дуйся, струями сладости нас усладившая.

Ра́дуйся, благоуханный цвѣте дѣвства, сла́вная
мученице Тати́ано.

Кондак 6

Проповѣдница веры истинныя истязателем твоим явилася еси, мученице достославная: сии бо, от ангелов ударения приемлюще и в конец изнемогше, возопиша к судии неправедному, да прекратит мучения твоя, яко пострадаша паче тебе, достославная. Ты же, видящи сие, молилася еси о них, Богу же присно воспевала: Аллилу́ия.

Икос 6

Воссия́ свет разума мучившим тя, Татиано, по молитве твоей, егда отверзошася им очи духовныя, и видеша четырех ангелов, окрест тебе стоящих, глас же с небесе, к тебе бывший, слышаша. И падоша сии пред тобою на земли, просяще прощения и взывающе ти:

Ра́дуйся, невре́дима в муках пребывшая;

ра́дуйся, мучителей посрамившая.

Ра́дуйся, небожителем уподобившаяся;

ра́дуйся, ангелы незримо защищаемая.

Ра́дуйся, к вере наставляющая;

ра́дуйся, к Богу приводящая.

Радуйся, истины взалкавшим пособнице;
радуйся, правды возжадавшим водительнице.
Радуйся, яко на твоя молитвы надеемся;
радуйся, яко на заступление твое уповаем.
Радуйся, яко ко Христу тобою привлекохомся.
радуйся, яко Царство тобою улучити чаем.
Ра́дуйся, благоуханный цвѣте дѣвства, сла́вная
мученице Тати́ано.

Кондак 7

Хотя́ ты идолопоклонницу сотворити, святая,
паки посла за тобою судия беззаконный и, видев
тебе здраву сущу, ласканием потщася
прельстити ты; не успев же, паки в мучение ты
предаде, не ведый пети: Аллилу́ия.

Икос 7

Дивное знамение видим о тебе, Татиано: егда бо
истязаху мучителие девственное твое тело, в
крове место млеко истече. Видяще убо сие,
вернии прославиша Бога, и мы воспеваем ти
радо́стно:

Ра́дуйся, до крове пострадавшая;

раду́йся, млеко излия́вшая.

Раду́йся, водою́ жизни напо́яющая;

раду́йся, вином благода́ти укрепля́ющая.

Раду́йся, сосу́де благово́нный;

раду́йся, ча́ше арома́тная.

Раду́йся, фи́миаме моли́твы;

раду́йся, фи́але благосты́ни.

Раду́йся, цве́те нетле́ния;

раду́йся, крине́ небе́сный.

Раду́йся, лозо́ чудото́чная;

раду́йся, ли́лие райска́я.

Раду́йся, благоуха́нный цве́те де́вства, сла́вная
му́ченице Тати́ано.

Кондак 8

Стра́нное чудо́ видим о тебе́, дево́ свя́тая: се бо в
муче́ниях не изнемо́гла еси́, оба́че мучите́лие
твои́ зело́ пострада́ша, би́ени бы́вшие от а́нгел
же́злы желе́зными; ты же́ просла́вляла еси́ о́ всем
Бога́, взыва́ющи́ Тому́: Аллилу́ия.

Икос 8

Всю себе предавши Христу, не убоялася еси
новых мучений, Татиано, но молитвою твоею
идолы в храме Дианы сокрушила еси; того ради
железными коготьми терзаема была еси и сосцев
исторжение претерпела еси. Ангели же Господни
паки явишася тебе и исцелиша тя от язв твоих.
Темже прими от нас пения сицевая:

Ра́дуйся, юности своея не пощадевшая;

радуйся, о телеси своем небрегшая.

Радуйся, противу нечестия воительнице;

радуйся, благочестия поборнице.

Радуйся, к небесным восшедшая;

радуйся, к горним востекшая.

Радуйся, на дольняя призирающая;

радуйся, к молением нашим ухо приклоняющая.

Радуйся, невесто Иисусова;

радуйся, возлюбленная Христова.

Радуйся, небесному Жениху обрученная;

радуйся, в чертог брачный вступившая.

Ра́дуйся, благоуха́нный цве́те де́вства, сла́вная
му́ченице Тати́ано.

Кондак 9

Вся́к земно́родный вострепета, виде́в чудо́ сие:
лев бо лю́тый кроткий агнец бы́сть, егда́ узре́ ты,
Тати́ано до́бльственна́я, и вместо́ еже по́глотити
ты, ласкаше́ся к тебе́ и но́зе твои́ облобызаше́;
хотя́щим же му́чителем извести́ его́ из цирка́
паки́ в кле́ть, расви́репе внеза́пу и сановника́
Евме́ния растерза́, не веду́ща пети́ Творцу́
вся́ческих: Аллилу́ия.

Икос 9

Ветии́ суемудре́ннии, силы́ Христо́вы не
разумева́юще, возгласи́ша, яко́ сила́ волшебна́я
во власе́х твои́х есть́ и сего́ ради́ ничто́же ты
вредит. Темже́ убо́ остриго́ша ты́ и в храме́
Дие́ве затвори́ша. Ангели́ же, ободря́юще ты́,
свята́я, си́це взы́ваху́ ти:

Ра́дуйся, деви́це небо́язненна́я;

ра́дуйся, ста́стотерпи́це до́бляя.

Ра́дуйся, му́ченице препросла́вленна́я;

ра́дуйся, дщи́ Царя́ небе́снаго.

Ра́дуйся, идо́ла низри́нувшая;

раду́йся, кумира низложившая.

Раду́йся, о Бозе ликовствующая;

раду́йся, о Христе веселящаяся.

Раду́йся, истинныя веры адаманте;

раду́йся, града горняго каменю.

Раду́йся, яко во Царствие внидеши;

раду́йся, яко с нами водворишися.

Ра́ду́йся, благоуханный цвѣте дѣвства, сла́вная
му́ченице Тати́ано.

Кондак 10

Спаси́тельныя и тихия пристани достигнути
желающи, лю́тая вся претерпела еси, мученице
славная. Неправедный же судия, не ведый, кая
новая страдания тебе измыслити, повеле тя
мечем усещи. Слышащи убо сия, Татиано
свя́тая, радостию воззвала еси Богу: Аллилу́ия.

Икос 10

Царю́ Небесному предстати тщащися, честную
твою главу купно со отцем твоим под меч
приклонила еси, и абие душа твоя свя́тая ко
престолу Вышняго аки облак легкий возлете,
ангели же и архангели, многоочити херувими и

шестокрылатии серафими, на небесех ты
сретающе, радостными гласы взываху тебе:

Радуйся, мученьми возвеличенная;

радуйся, девством возвысившаяся.

Радуйся, страданьми окриленная;

радуйся, чистотою вперенная.

Радуйся, голубице чистая;

радуйся, ластовице радостная.

Радуйся, славию небесный;

радуйся, птице райская.

Радуйся, к трисятельному Солнцу
воспаряющая;

радуйся, к трисветлому Светилу возносящаяся.

Радуйся, Жениха своего достигшая;

радуйся, Жизнодавцу прилепившаяся.

Радуйся, благоуханный цвѣте дѣвства, сла́вная
мученице Тати́ано.

Кондак 11

Пѣние непрестанное возносит ти Церковь Христова, Татиано славная, людие же российстии, десницу твою честную аки сокровище бесценное имуще, Спасителю выну вопиют благодарственно: Аллилу́ия.

Икос 11

Свѣту познания книжнаго в стране Российстей воссияти восхотевши, благочестивая царица Елисавета повеле всеучилище во граде Москве создати, еже юношам от семейств знатных и простых, богатых же и бедных различныя науки тамо постигати. Болярин же Иоанн и Михаил многомудрый, волю царицыну исполняюще, устроиша вся к сему благопотребная. В день же памяти твоея, мученице святая, иже бе день тезоименитства матери сего Иоанна, издадесе указ царский о открытии всеучилища в первопрестольном граде, последи же и храм во имя твое освящен бысть, идеже учащии купно со учащимися взываху тебе радостно:

Ра́дуйся, в ветсем Риме от язык мученная;
радуйся, в Новом Риме служением почтенная.
Радуйся, Третьяго Рима покровительнице;

раду́йся, в небесном граде веселя́щаяся.

Раду́йся, юности наставнице;

раду́йся, младости путево­дительнице.

Раду́йся, во учении помогающая;

раду́йся, молящих тя не оставляющая.

Раду́йся, капища неверных сокрушившая;

раду́йся, во храме христианством по­клоняемая.

Раду́йся, благочестию научающая;

раду́йся, к целомудрию увещающая.

Раду́йся, благоуханный цвѣте дѣвства, сла́вная мученице Тати́ано.

Кондак 12

Благода́ть заступления твоего улучшить ищуще, во всей державе Российстей устроить храмы во имя твое начаша людие Христовы, творения Божия испытующии и премудрость Творца познати тщащися, и Небесному Отцу взывающии: Аллилу́ия.

Икос 12

Пою́ще славу твою, страстоносице дивная, и о хвале, во отечестве нашем земном тебе

возносимой, веселящаяся, вкупе со всеми христианы блажим тя радованьми сими:

Ра́дуйся, мудрость земную отринувшая;

радуйся, к премудрости небесней устремившаяся.

Радуйся, сию премудрость нам ниспосылающая;

радуйся, во тварех Творца зрети наставляющая.

Радуйся, девичу кровь за Христа пролившая;

радуйся, мучением венца сподобльшаяся.

Радуйся, в полце́ мученик Бога хвалящая;

радуйся, Троицу в девичестем лице прославляющая.

Радуйся, Создателю прилепившаяся;

радуйся, с Содетелем соединившаяся.

Радуйся, благодатию сердца нам возжигающая;

радуйся, к обо́жению верных призывающая.

Ра́дуйся, благоуханный цвёте дёвства, сла́вная мученице Тати́ано.

Кондак 13

О всесла́вная и великоиме́нная му́ченице Христо́ва Тати́ано, девства и чистоты́ сосу́де златый! При́зри ми́лостиво на моля́щихся ти и приле́жно прося́щая моли́твеннаго твоего́ у Бо́га предста́тельства. Да́руй нам чистоту́ те́ла и души́, изба́ви нас муче́ний грехо́вных, да вы́ну Го́споду зове́м: Аллилу́ия.

Сей конда́к глаго́лется три́жды.

И па́ки чте́тся 1–й и́кос и 1–й конда́к

Молитва 1

О свята́я му́ченице Тати́ано! Невесто́ сладчайшаго Жени́ха твоего́ Христа, агнице́ Агнца́ Божественнаго, голуби́це целомудрия! благоуханное тело́ страданьями, яко оде́ждами царскими́ одея́вшая, к ликомъ небе́сным сопричтенная, лику́ющая ны́не во славе вечней! От дней мла́дых Бо́гу обеща́вшаяся свята́я служительнице́ Церкви, целомудрие́ соблю́дшая и паче́ всех́ благ Го́спода возлю́бившая! Тебе́ молимся́ и тебе́ просимъ: вонми́ проше́нием нашимъ́ сердечнымъ́ и не отве́ргни моле́ний нашихъ́! Да́руй чистоту́ телу́ и души́, вдохни́ любовь́ к божественнымъ́ истинамъ́, на путь́ добродетелей́ настави́ нас, анге́льское нам

охранение у Бога испроси. Раны наша и язвы телесныя уврачуй, юность огради, старость безболезненну и безбедну даруй, в смертном часе помози! Поминай наша скорби, и отраду даруй! Посети нас, сущих в темнице греха: на покаяние настави скоро, возжги пламень молитвы! Не остави нас сырых! Да, славяще страдания твоя, воссылаем хвалу Господу сил, всегда, ныне и присно и во веки веков. Амѣнь.

Молитва 2

Мученице Христова, Татиано славная, всеучилища града сего превопрестольнаго небесная покровительнице, учащихъ в нем и учащихъ известная заступнице! К предстательству твоему ныне притекающе, молимся ти, страдотерпице всехвальная: сохрани умы наша чисты от всякия скверны, сердца же наша познанием истиннаго Бога просвети. Сподоби нас, земныя науки вся постигше, и высшему учению навыкнути, еже есть памятование о Бозе и молитва непрестанная. Буди ходатаица о нас пред престоломъ Всевышняго, да, скончавше поприще сие земное, внидем и мы в селения райская и тамо, вкупе с тобою и со всеми святыми, прославимъ всечестное и поклоняемое имя Отца и Сына и Святаго Духа во веки веков. Амѣнь.

Молитва 3

О святая мученице Татиано, прими ныне нас, молящихся и припадающих к святой иконе твоей. Молися о нас, рабех Божиих (имена), да избавимся всяких скорбей и болезней душевных и телесных и благочестне проживем в настоящем житии, и в будущем веце сподоби нас со всеми святыми поклоняться в Троице славимому Богу, Отцу и Сыну и Святому Духу, ныне и присно и во веки веков. Аминь.

